



Газет 1931 жылдың  
5 тамызынан шыға бастады

# Ақжетік арайы

№6 (1282)

11 ақпан  
2025 жыл

Газет әр аптаның  
сейсенбі күні шығады

www.mangystaumedial.kz

## БІЛІМ

### МЕМЛЕКЕТ БАСШЫСЫ ОТАНДЫҚ БИЗНЕС ӨКІЛДЕРІМЕН КЕЗДЕСУДЕ ҮКІМЕТКЕ ҚОСЫМША ҚҰН САЛЫҒЫ МӘСЕЛЕСІН ТАҒЫ ДА ПЫСЫҚТАУДЫ ТАПСЫРДЫ



– Кез келген реформаны жан-жақты сараптап, байыппен жүргізген жөн. Экономика салаларының ерекшеліктерін ескере отырып, түрлі нұсқаларды әзірлеу керек.

Қосымша құн салығына қатысты бұған дейін көзқарасымды білдірмеген едім. Өйткені қызметтік дәрежеме сәйкес, менің әрбір сөзім, пікірім қатаң тапсырма сияқты қабылданады. Соған қарамастан бұл мәселе бойынша ойымды жеткізім келеді. Қалай десек те, қосымша құн салығының мөлшерлемесі сараланып

белгіленуге тиіс.

Үкімет түпкілікті шешімді білікті сарапшылардың, қайталап айтамын, білікті сарапшылар мен кәсіпкерлердің, әлбетте депутаттардың пікіріне құлақ аса отырып, нақты есептеулер негізінде қабылдағаны дұрыс.

Бір анығы, Үкіметтің қазіргі ұсынып отырған мөлшерлемесі тым жоғары. Сіздер нақты цифрды айттыңыздар. Оны қоғам қызу талқылады. Тіпті, кей жағдайда артық сөздер де айтылды. Дегенмен, бұл қоғам талқысына алдын ала салынған ұсыныс болатын. Тағы қайталап айтамын, Үкіметтің бұл бағыттағы жұмысы бизнес, қоғам, кәсіпкерлер, сарапшылардың, яғни барлық тараптың пікірі ескеріле отырып жалғасуы керек. Биыл нақты шешім қабылдануға тиіс. Мен бұған дейін де айттым: Үкімет бұл мәселені депутаттармен және сарапшылармен егжей-тегжейлі талқылауы керек. Бүгін айтылған ой-пікірлер де ескеріледі. Мемлекетке барынша оңтайлы шешім қажет. Яғни бір жағынан бизнес жүргізуге кедергі келтірмей, қолайлы жағдай жасайтын, ал екінші жағынан, салыққа қатысты тәртіпті күшейтіп, бюджет кірісін арттыратын тиімді жолды табуымыз қажет, – деді Қасым-Жомарт Тоқаев.

t.me/qaorda\_resmi

## СПОРТ

### Жарайсыңдар, ігіттер

Ж.Мыңбаев атындағы мектеп-гимназиясының 11-сынып оқушысы Рысқалиұлы Қожахмет Үндістан елінде өтіп жатқан халықаралық «India Open» ашық турнирінің чемпионы атанып, алтыннан алқа тақты.



Қожахмет Рысқалиұлы 8 жылдан астам уақыт кикбоксингпен шұғылданып келеді. Осы аралықта республикалық, халықаралық жарыстардың бірнеше мәрте жүлдегері атанды.

Сонымен бірге, Ерікұлы Аманбек 54кг салмақта ересектер арасында топ жапырып, чемпион атанды. Бапкері Болатбек

Құдайбергенов.

Атап айтсақ, Қазақстан чемпионатынан басқа, 2024 жылдың көктемінде Түркия елінде өткен кикбоксингтен «Әлем кубогының» қола жүлдегері, 2024 жылдың қараша айында Молдавия елінде өткен халықаралық турнир жеңімпазы атанды.

## ИНФРАҚҰРЫЛЫМ

### КӨНЕ КЕТІКТІҢ ЖАҢА ЗАУЫТЫ

Наурыз тойында ашылмақ

Тұзды теңіздің жағасында тұрып, ғасырлар бойы тұщы суға жарымаған Кетіктің енді қағанағы қарық, сағанағы сарық болатын кезі келді. Көп ұзамай жаңа Теңіз суын тұщытатын зауыт іске қосылмақ. Американдық технология бойынша және американдық француз қондырғылары қойылып жатқан бұндай зауыт Қазақстанда бұрын-соңды болмаған. Тек Францияда және Жапонияда ғана бар екен!



Зауыт құрылысы мен оның мүмкіндігі жайлы маған аудандық әкімдік пен қоғамдық келісімінің осы құрылыстың барысын қадағалаушы өкілі, аудандық су жүйесі бөлімі бастығының орынбасары Али Аманефесов айтып берді. Айта кету керек, бұл жігіт – коммуналдық саладағы ең мықты мамандардың бірі, Ақжетіктің су шаруашылығын өз қолымен құрған, осы жұмыстың қыр-сырын, бүкіл су жүйесінің жай-күйін бес саусағындай білетін, елдің құрметіне бөленген азамат!



Тұщытылатын су жағадан 60 метр қашықтықтан, 7 метрдей тереңдіктен, жер астымен тартылған құбырмен алынып, құм мен қиымдардан тазартатын бірінші сүзгіден өтеді. Сосын суда кездесуі мүмкін әртүрлі ластардан тазартатын екінші сүзгіге барады. Одан өтіп барып ультратехнологиялық сүзгіден залалсыздандырып, бойындағы барлық зиянды микроорганизмдерден тазартатын қондырғыдан өтеді де, құрамындағы тұздан айыратын ең жаңа технологиямен жасалған мембраналық сүзгілерге барады. Оған аз мөлшерде Кетік кенішінен алынған жер асты суы қосылады. Санитарлық және экологиялық талаптарға сай келетіндей етіп, адам ағзасына қажетті реакгенттер қосылады да, үлкен резервуарға жиналады. Судың сапасы лабораторияда ең соңғы үлгідегі қондырғылармен үздіксіз тексеріліп тұрады. Осы жерден қуатты компрессорлар су құбырларының бойымен халыққа жібереді. Төрт компрессорлық линия бар – Аташқа бөлек, Баутинге бөлек, Жаңа Кетікке бөлек және қалаға бөлек, тағы біреуі резервте тұр. Осы процесстердің бәрі компьютерлермен қадағаланып, автоматты түрде жасалады. Тіпті, сыртта тұрған резервуарлардың ішінде суды қатырмайтын электр жылытқыштары бар екен. Ал, негізгі қондырғылар тұрған алып залдың іші инфрақызыл сәулелі жылытқыштармен бір қалыпты температура ұстап тұрады. Екі желіден электр қуаты алынып тұрады, біреуі резервте болмақ.

Жалпы, жаңа зауыт жайлы жаңалықтарға халықтың құлағы түрулі. Сарылдап келіп жататын тұщы суды асыға күтулі. Осыған орай, көкейде жүрген сұрақтар да бар. Сол қарапайым көпшіліктің бірі болып, сол сұрақтарды Алиға қойдым. Бірінші түйткіл – зауыттан шығатын су қысымы күшті. Ертең ертеректе төселген құбырлар оған шыдамайды-ау.

–Қысымды осы жерден реттеп, мөлшерлеп жібереміз. Сонда Аташ, Баутин, Жаңа Кетіктің ең алыс деген үйіне де су еркін барып тұрады, –дейді Али.

«Ақтаудағы құсаған, суды бұға айналдырып, сосын қайтадан суға айналдырған өлі су ішетін боламыз» дейді біреулер.

–Бұл жерде суды бұға айналдырмайды. Тек құрамынан

тұзды айырып аламыз. Бұл жерде француздың Veolia компаниясының сүзгілері қойылған үш қондырғы бар. Біреуі резервте тұрады. Әр сүзгі 30 мың сағатқа арналған, –дейді Али.

30 мың сағат – шамамен 3,5 жыл. Қондырғыны сатқан компания сүзгілермен де уақытында қамтамасыз етіп тұратын болады.

Айта кету керек, зауыт күніне 5 мың текше метр су тұщытып бере алады. Ол қазіргі қажеттіліктен 3,5 еседей көп. Болашақта басқа да тұтынушылар шығары сөзсіз. Мысалы, Қашаған кеніші.

–Судың бағасы бұрынғыдан қымбат болатын шығар?

–Бұл зауыт қыруар қаржыға салынып жатыр. Түптің түбінде ол шыққан шығын ақталуы керек. Бірақ, ауыз сумен қамту – әлеуметтік салаға жатады. Үкіметтің субсидиялары мен дотациялары бар. Бұның бәрі облыста қаралып жатқанға ұқсайды. Менің ойымша, аса қымбат болмайды, –дейді Али.

Болашақта зауытта 30 адам жұмыс істемек. Негізгі мамандар – лаборанттар мен технологтар іріктеліп жатыр. Табылып та жатқандай. Жергілікті жігіттердің бір тобы қазір құрылысшылардың қасында жұмыс істеп, үйреніп тәжірибеден өтіп жатқан көрінеді. Жұмысшылардың бәрі өзіміздің балдар болмақ.



Айта кету керек, зауыт – стратегиялық нысан болып есептеледі, өте қатты күзетілетін болады.

Зауыттың құрылысын «Толағай-2050» компаниясы салып жатыр. Кілең қазақ жігіттер. Басшысы – Исенәлиев Әлібекпен, учаске бастығы Қуанышев Талғатпен, бас энергетик Ағажәев Айдармен сөйлестім. Білімділігі мен біліктілігі көрініп-ақ тұрған, іскер жігіттер. Оралдық азаматтар екен. Сөз саптауына, қарапайымдылығы мен осыншама күрделі шетелдік қондырғыларды орнатып, сынап, үйлестіріп жатқан шеберлігіне риза болдым.

Зауыт құрылысы Наурыз мейрамына қарай аяқталып, пайдалануға беріледі деген есеп бар.

\*\*\*  
Менің ойыма бір нәрсе келіп отыр. Көп ұзамай, үйімізге құбырмен сарылдап тұщы су келетін болады. Бақшаны да осы сумен суарамыз. Үнем жағына мән беру керек. Тамшылатып суару сияқты, заманауи әдістерді үйрену, қолдану керек болады, жерлестер!..

Суреттерде зауыттың іші бейнеленген. Сөйлесіп тұрғандардың ортасындағы – Али Аманефесов. Сол жақта – Ағажәев Айдар, оң жақта Қуанышев Талғат.

Айсағали ҚЫДЫР.



АДАМ.ҚОҒАМ.ЗАҢ.

# СОТ ЖҮЙЕСІН ЖЕТІЛДІРУ – ҚОҒАМНЫҢ ӘДІЛ ТАЛАБЫ

## Аудандық сот жылды қорытындылады

Түпқараған ауданының сотында кез келген маңызды іс-шараға бұқаралық ақпарат құралдары мен қоғам өкілдерін шақыру оң тәжірибеге айналған.

Аудандық соттың төрағасы Е. Бегенов бұқаралық ақпарат құралдары мен қоғам өкілдері алдында аудандық соттың 2024 жылдың 11 айында атқарылған жұмыстары жөнінде есеп берді. Оған арнайы «Ақкетік арайы» газетінің тілшісі М.Елеусінова қатысқан брифингте аудандық сот төрағасы осы уақыт аралығында жүргізілген қылмыстық істер және азаматтық істер мен әкімшілік құқық бұзушылық ісі бойынша ақпарат берді.

Аудандық соттың төрағасы Е. Бегенов: - Өткен 2024 жыл қылмыстық іс бойынша жыл басында қалдыққа 5 тұлғаға қатысты 4 қылмыстық қалдырылған. 2024 жылдың 11 айында 54 тұлғаға қатысты 46 қылмыстық іс түскен. (46 іс электронды) оның ішінде 45 тұлғаға қатысты 38



қылмыстық іс аяқталған. 32 тұлғаға қатысты 29 қылмыстық іс бойынша айыптау үкімі, 1 тұлғаға қатысты 1 қылмыстық іс сот өндірісімен қысқартылған, 7 тұлғаға қатысты 4 қылмыстық іс соттылығы бойынша жолданылған, 5 тұлғаға қатысты 4 қылмыстық іс қайтарылған. Теріс қылық бойынша -163 (10) ОҚылмыс-22 (40) (онша ауыр емес-5 (2), орташа-5 (7), ауыр-13 (31) Сондай-ақ, азаматтық істер бойынша жыл басына қалдыққа 33 азаматтық іс, 10 талап қою қалған. Ағымдағы жылдың 11 айында барлық түскен талап қою саны-450, соттылық бойынша түскен істер-10,

қайтарылғандар-53, қабылдаудан бас тартылғандар-5. Бұйрықтық іс жүргізумен-60 іс, шешіммен аяқталған азаматтық істер саны – 178 (оңайлатылған (жазбаша) іс жүргізу тәртібімен қаралғандар-113), қараусыз қалдырылғандар саны-31, барлық аяқталған істер саны-391, қалдық істер саны – 41. Іс бойынша іс жүргізуі тоқтатылған-117, істің ішінде медиация тәртібімен-2, бітімгершілік келісімімен-81, талап қоядан бас тартуымен-34.

Одан бөлек, әкімшілік құқық бұзушылық іс бойынша 2024 жылдың басына қалдыққа -6 іс қалғандығын, 11 айда 323 әкімшілік құқық бұзушылық іс түсіп, әкімшілік құқық бұзушылық іс қайтарылған, 310 тұлғаға қатысты 310 әкімшілік іс қаралған, әкімшілік құқық бұзушылық жаза қолдану туралы қаулы шығарылғаны істер-248, 62- әкімшілік құқық бұзушылық істің өндірісі қысқартылған, 5- әкімшілік істің өндірісі 2 іске біріктірілгендігін жеткізді. Дыбыс-бейне жазба құрылысын қолданып (100%) іс қаралған.

Сонымен қатар, әкімшілік рәсімдік-процестік кодексі бойынша істер түспеген. Жыл басынан 1 ӨРПК бойынша 1 іс қаралып, кері қайтарылғандығын айтты.

# МЕМЛЕКЕТТІК ҚЫЗМЕТ АЛУШЫЛАРДЫҢ ҚҰҚЫҚТАРЫ ҚОРҒАЛДЫ

2024 жылдың қорытындысы бойынша Мемлекеттік қызмет істері агенттігінің Маңғыстау облысы бойынша департаментіне мемлекеттік көрсетілетін қызметтердің сапасына қатысты 49 қызмет алушының құқықтары толық қорғалды.

Департаментпен өтініш негізінде жоспардан тыс тексеру немесе сұрау салу арқылы, проактивті түрде қашықтықтан бақылау нәтижесімен және «Еgov.kz» телеграмм бот арқылы жүгінген қызмет алушылардың құқықтары қалпына келтірілді.

Қызмет алушылардан келіп түскен арыз-шағымдарының басым көпшілігі жер қатынастары және сәулет-қала құрылысы қызметі салаларына қатысты.

Мысалыға, Департаментке Ақтау қаласы әкімдігінің сәулет-қала құрылысы саласындағы бөлімінің сәулет жоспарлау тапсырмасын алу кезіндегі қабылдаған бас тарту туралы шешімімен келіспейтіндігі жөнінде шағым келіп түсті.

Тексеру нәтижесінде, шағым иесінің уәждері өз дәлелін тауып, Бөлімге анықталған бұзушылықтарды жою туралы нұсқама енгізіліп, қызмет алушының заңды мүдделері мен бұзылған құқықтары толықтай қалпына келтірілді.

Бұған қоса, аталған заңбұзушылықтарға жол бергені үшін Ақтау қаласы әкімдігіне қарасты сәулет және қала құрылысы саласындағы уәкілетті органның басшысына «Әкімшілік құқық бұзушылық туралы» Кодексінің 465 бабының 2 бөлігіне сәйкес әкімшілік іс қозғалып, 55 580 теңге көлемінде айыппұл салынды.

Сондай-ақ, 2024 жыл қорытындысы бойынша Департаменттің тікелей араласуымен өтініш негізінде жер қатынастары саласында 15 қызмет алушының, сәулет-қала құрылысы қызметі саласында 3, ал әлеуметтік және қаржы саласында 4 қызмет алушының, проактивті түрде қашықтықтан бақылау нәтижесімен 13,



телеграмм бот арқылы жүгінгендерден 12 қызмет алушылардың құқықтары қорғалды.

Анықталған бұзушылықтарға жол берген мемлекеттік органдардың қызметкерлеріне Департаментпен тиісті шаралар қабылданып, нәтижесінде 15 мемлекеттік қызметшіге тәртіптік шара, 2 лауазымды тұлғаға әкімшілік шара қолданылды.

Осы ретте, құрметті облыс тұрғындары мемлекеттік қызмет көрсету кезінде заңнама талаптарының сақталмағанына куә болсаңыз, яғни мемлекеттік қызмет көрсету мерзімі бұзылса, мемлекеттік қызмет көрсетуден негізсіз бас тартылса, артық құжаттар талап ету фактісі болса немесе қызмет көрсету талабы бұзылса, Сіз құқығыңызды Департаментке шағымдану арқылы қорғай аласыз.

Біздің мекен-жайымыз: Ақтау қаласы, 14 ш.а., 1 ғимарат, 2-Блок. Байланыс нөмерлері: 8 (7292) 30-36-49, 8 (7292) 30-30-39 кеңсе нөмірі.

**Тоқтамыс ЖҰМАҒҰЛОВ,**  
Мемлекеттік қызмет істері агенттігі  
Маңғыстау облысы бойынша департаментінің  
басшысы, әдеп жөніндегі кеңес төрағасы.

КӨКТЕМ – 2025

# ТӨТЕНШЕ ЖАҒДАЙҒА ТӨТЕП БЕР

Аудан аумағында «Көктем-2025» республикалық командалық-штабтық оқу жаттығуы өткізілді.

Оқу жаттығудың мақсаты басқару органдарының, азаматтық қорғау мемлекеттік жүйесінің күштері мен құралдарының көктемгі кезеңдегі су тасқыны жағдайында төтенше жағдайлардың алдын алу және оларды жою жөніндегі іс-қимылдарға дайындығын

тексеру болып табылады.

Оқу-жаттығу шеңберінде азаматтық қорғау қызметтері мен құралымдарының дайындығына тексеру, табиғи және техногендік сипаттағы төтенше жағдайларды жоюға, су тасқыны кезеңі жағдайында халықтың қауіпсіздігін қамтамасыз етуге, іс-қимылдарды одан әрі жетілдіру жедел штабтың жұмысы жүргізілді.

Оқу-жаттығуды өткізу кезінде азаматтық қорғау қызметтерінен 36 арнайы техника, 112 адам жұмылдырылды.

## ҚОҒАМДЫҚ ТЫҢДАУ ТУРАЛЫ ХАБАРЛАНДЫРУ

«АКТАУ-ТРАНЗИТ» ЖШС «Жанғурши кен орнында жер қойнауын пайдалану салдарын жою» жобасына ҚОҚБ және табиғатты қорғау іс шараларының жоспары бойынша қоғамдық тыңдаулар өткізетінін хабарлайды.

Қоғамдық тыңдау 2025 жылы 18 наурызда сағат 10:00-де өтеді.  
Өткізу орны: Маңғыстау облысы, Таушық ауылы, әкімдік ғимаратында өтеді.  
Онлайн қосылымға сілтеме: <https://us05web.zoom.us/j/2703168932?pwd=OTVCTmhlb1gyVklwWlFBaXN6NzRLZz09&omn=87487941729> Конференция идентификаторы 270 316 8932. Кіру коды: 96c0iG

Тапсырыс беруші: «АКТАУ-ТРАНЗИТ» ЖШС, БСН 000740003881, Ақтау қ., 4/ш/а, 42 ғимарат, 3 этаж тел.: 87711060688.

Жобаны әзірлеуші: «Gals» ЖШС, Ақтау қ., 4 ш/а, 42 ғимарат, 3 этаж тел.: 87789166528.  
Жергілікті атқарушы орган: «Маңғыстау облысының табиғи ресурстар және табиғат пайдалануды реттеу басқармасы» ММ, жауапты тұлға Сабина Базарбай, эл. пошта: [s.bazarbay@mangystau.gov.kz](mailto:s.bazarbay@mangystau.gov.kz), тел.: 8(7292) 43-10-88; Жобалық құжаттама БЭП <https://ecportal.kz> сайтында орналастырылған.

## ОБЪЯВЛЕНИЕ О ПРОВЕДЕНИИ ОБЩЕСТВЕННЫХ СЛУШАНИЙ

ТОО «АКТАУ-ТРАНЗИТ» объявляет, что проводит общественные слушания по РООС к «Проекту ликвидации последствий недропользования на м/р Жанғурши» ИПМ. Слушания состоятся: 18 марта 2025 года в 10:00 ч.

Место проведения: Мангистауская область, село Таушық, в здании акимата.  
Ссылка на онлайн подключение: <https://us05web.zoom.us/j/2703168932?pwd=OTVCTmhlb1gyVklwWlFBaXN6NzRLZz09&omn=87487941729>

Идентификатор конференции 270 316 8932. Код доступа: 96c0iG  
Заказчик: ТОО «АКТАУ-ТРАНЗИТ», БИН: 000740003881, г.Ақтау, 4 мкр, 42 здание, 3 этаж, тел.: 87711060688.

Разработчики проектов: ТОО «Gals», г.Ақтау, 5 мкр, 8 дом, офис 110, тел: 87789166528.

Местный исполнительный орган: ГУ «Управление природных ресурсов и регулирования природопользования Мангистауской области», ответственное лицо Базарбай Сабина Саламатқызы, эл. почта: [s.bazarbay@mangystau.gov.kz](mailto:s.bazarbay@mangystau.gov.kz), тел. 8 (7292) 43-10-88; Документация по проекту размещена на сайте ЕЭП <https://ecportal.kz>.

## ҚОҒАМДЫҚ ТЫҢДАУ ТУРАЛЫ ХАБАРЛАНДЫРУ

«АКТАУ-ТРАНЗИТ» ЖШС «Түбейік кен орнында жер қойнауын пайдалану салдарын консервация және жою» жобасына ҚОҚБ және табиғатты қорғау іс шараларының жоспары бойынша қоғамдық тыңдаулар өткізетінін хабарлайды.

Қоғамдық тыңдау 2025 жылы 18 наурызда сағат 15:00-де өтеді.  
Өткізу орны: Маңғыстау облысы, Форт-Шевченко қаласы, қалалық Әкімшілікте, Аманат ғимараты, 1 этаж, конференц-залында өтеді.

Онлайн қосылымға сілтеме: <https://us05web.zoom.us/j/2703168932?pwd=OTVCTmhlb1gyVklwWlFBaXN6NzRLZz09&omn=85605444839> Конференция идентификаторы 270 316 8932. Кіру коды: 96c0iG

Тапсырыс беруші: «АКТАУ-ТРАНЗИТ» ЖШС, БСН 000740003881, Ақтау қ., 4/ш/а, 42 ғимарат, 3 этаж тел.: 87711060688.

Жобаны әзірлеуші: «Gals» ЖШС, Ақтау қ., 4 ш/а, 42 ғимарат, 3 этаж тел.: 87789166528.  
Жергілікті атқарушы орган: «Маңғыстау облысының табиғи ресурстар және табиғат пайдалануды реттеу басқармасы» ММ, жауапты тұлға Сабина Базарбай, эл. пошта: [s.bazarbay@mangystau.gov.kz](mailto:s.bazarbay@mangystau.gov.kz), тел.: 8(7292) 43-10-88; Жобалық құжаттама БЭП <https://ecportal.kz> сайтында орналастырылған.

## ОБЪЯВЛЕНИЕ О ПРОВЕДЕНИИ ОБЩЕСТВЕННЫХ СЛУШАНИЙ

ТОО «АКТАУ-ТРАНЗИТ» объявляет, что проводит общественные слушания по РООС к «Проекту консервации и ликвидации последствий недропользования на м/р Тюбеджи» ИПМ. Слушания состоятся: 18 марта 2025 года в 15:00 ч.

Место проведения: Мангистауская область, г.Форт-Шевченко, городской акимат, здание Аманата, 1 этаж, конференц-зал.

Ссылка на онлайн подключение: <https://us05web.zoom.us/j/2703168932?pwd=OTVCTmhlb1gyVklwWlFBaXN6NzRLZz09&omn=85605444839> Идентификатор конференции 270 316 8932. Код доступа: 96c0iG

Заказчик: ТОО «АКТАУ-ТРАНЗИТ», БИН: 000740003881, г.Ақтау, 4 мкр, 42 здание, 3 этаж, тел.: 87711060688.

Разработчики проектов: ТОО «Gals», г.Ақтау, 5 мкр, 8 дом, офис 110, тел: 87789166528.

Местный исполнительный орган: ГУ «Управление природных ресурсов и регулирования природопользования Мангистауской области», ответственное лицо Базарбай Сабина Саламатқызы, эл. почта: [s.bazarbay@mangystau.gov.kz](mailto:s.bazarbay@mangystau.gov.kz), тел. 8 (7292) 43-10-88; Документация по проекту размещена на сайте ЕЭП <https://ecportal.kz>.

ЖАСТАР САЯСАТЫ

# ОЙЫНҚҰМАРЛЫҚ ҚҰРДЫМҒА КЕТІРЕДІ

Қарақия ауданы бойынша шекара басқармасы, «Түпқараған» шекара бөлімшесіндегі жас сарбаздармен лудомания (ойынқұмарлық) және нашақорлықтың алдын алу мақсатында және жат ағымдар бойынша түсіндірме жұмыстары жүргізіліп, кездесу ұйымдастырылды.

Іс-шараның басты мақсаты – зиянды әдеттердің салдары туралы түсіндіру,

құқықбұзушылықтың алдын алу және әскери ортада салауатты өмір салтын насихаттау. Кездесу барысында Түпқараған аудандық Орталық емхана дәрігері психиатр-нарколог Аманова Ақилгек Арқабайқызы, Дінтанушы маман Жолдасбайұлы Нұрбек сарбаздарға лудомания мен нашақорлықтың адам денсаулығына, психикасына және әлеуметтік өміріне тигізетін зияны туралы баяндап, олардың әскери қызметке кері әсерін түсіндірді. Сондай-ақ,



зиянды әдеттерден қалай сақтану керектігі, олардың алдын алу жолдары мен құқықтық жауапкершілік мәселелері талқыланды. Мұндай кездесулер әскери ортада тәртіп

ТҮБЕК ТАРИХЫ БЕТТЕРІНЕН

# ҚАРАТЕРЕҢГЕ ТАРАС КЕЛГЕН ЖЫЛ

(Сөз бен сурет)

**Жалпыадамзаттық рухани құндылықтарды дамытуға айрықша үлес қосқан тұлғалардың бірі – Тарас Григорьевич Шевченко.**

Әсіресе, оның шығармалары біздің халқымызға өте жақсы таныс. Өмірінің біраз бөлігін қазақ жерінде өткізген ол бұл елдің тұрмыс-тіршілігін, салт-дәстүрлерін өз шығармашылығына арқау етті. Кобзарь ақын ретінде де, суретші ретінде де жергілікті халықтың ахуалын көркем өнер туындыларында шынайы бейнелеп, руханият тарихында қалдырды.

Қазақ қаламгерлерінің де Шевченкоға деген ықыласы ерекше болды. Әр жылдарда оған арналып бірқатар шығармалар жазылды. Әдебиетіміздің көрнекті өкілдері Сәбит Мұқанов, Қасым Аманжолов, Әбділда Тәжібаев, Тайыр Жароков, Асқар Тоқмағамбетов, Дихан Әбішев, Сапарғали Бегалин, Қалижан Бекқожин, Ғафу Қайырбеков, Сырбай Мәуленов, Шәмлі Мұхамеджанов, Ізтай Мәмбетов, Жүмекен Нәжімеденов, Тұманбай Молдағалиев, Фариза Оңғарсынова, Қайрат Жұмағалиев, Сәкен Иманасов, Құлманбай Көпішев, Тілеген Шопашев, Ержеш Ибраһим, Әубәкір Нәлібаев, Дәуітәлі Стамбеков, Асқар Егеубаев және басқа ақын-жазушылар Шевченконың әдеби шығармаларын өз тілімізге аударды.

Кобзарьдың өмірбаянында елеулі орын алатын және ең көп аталатын елді мекеннің бірі – Қосарал. Сырдарияның теңізге құяр жеріне жақын орналасқан Қосаралды мекен еткен ақын өзінің өлеңдері мен суреттері арқылы Аралдың бүкіл болмысын көрсете алған. Бір кезде Қосарал тұрған аймақта қазір Қаратерең елді мекені орналасқан. Осы Қаратереңдегі орта мектеп ұзақ жылдар бойы Т.Г.Шевченконың атымен аталды. ХХ ғасырдың орта шенінде бұл жерде Шевченко атындағы балық колхозы болды. Сондықтан бұл ауылдың тұрғындары Кобзарьдың өмірбаяны мен шығармашылығы жөнінде жақсы хабардар. Оның үстіне ауыл шетінде «Тарас Шевченко 1848-1849 жылдарда Қосаралда болған кезінде отырғызған ағаш» деген жазуы бар тақтайша ілінген жиде ағашының өсіп тұруы елдің ақынға деген айрықша құрметінің белгісіндей еді. Өз басым осы ауылда туып-өсіп, сол мектепте оқығандықтан, мұғалімдердің осы жиде ағашына оқушыларды ертіп апарып, арнайы шаралар өткізгеніне бірнеше рет куә болдым.

Т.Г.Шевченко өмірін зерттеушілер оның А.И.Бутаков экспедициясы құрамында болған кездегі салған суреттерін хронологиялық тұрғыдан топтап, бес кезеңге бөледі. Соның үшінші кезеңі «Қосаралды қыстап шығу» («Зимовка на Кос-Арал») деп аталады. Бұл мезгілдегі туындылар 6.X.1848 ж. – 6.V.1849 ж. (№32-43 суреттер және №173-177 суреттер) аралығын қамтиды.

Әйгілі ақынның қарындашпен салған «Қосарал бекінісі алдындағы шхуналар» («Шхуны возле укрепления Кос-Арал»), «Қосаралдағы бағдар белгісі» («Маяк на Кос-Арал»), «Қосарал бекінісі және бастың кескіндемелері» («Укрепление Кос-Арал и наброски голов»), «Барсакеймес аралы» («Остров Барса-Кельмес») акварельмен бейнеленген «Қосаралдағы айлы түн» («Лунная ночь на Кос-Арал»), «Қосаралдағы қазақ бекеті» («Казахская стоянка на Кос-Арал»), «Аралдың тік жар жағалауы («Крутой берег Аральского моря»), «Арал теңізінің жағасында» («На берегу Аральского моря»), «Көкарал аралы» («Остров Куг-Арал»), сепия тәсілінен қолданған «Қосарал бекінісінің қысқы кейпі» («Укрепление Кос-Арал зимой») (екі сурет), «А.Бутаков пен А.Истоминнің Қосаралды қыстап жатқан кезі» («А.Бутаков и А.Истомин во время зимовки на Кос-Арал»), тағы басқа суреттері бір кезде оның өзі тұрақтаған елді мекеннің табиғатын, адамдарын, ауыл айналасындағы өзен-көлдердің көріністерін шынайы бедерлегенімен құнды.

Арал даласының бұдан бір жарым ғасыр бұрынғы бейнесі мен бүгінгі кейпінің арасында ұқсастық пен сабақтастық бар екенін анық аңғарасыз. Бұл ұқсастық тек көркем пейзаждардан ғана байқалмайды, суретші кейіпкерлерінің сыртқы сипатынан, мінез-құлқынан да сезіледі. Әсіресе, «Қосаралдағы айлы түн» картинасындағы көкжиектен көрінген толған ай, оның сәулесі түсіп, жарқырап жатқан көл, су бетінде түнгі желмен тербелген қамыс пен қоға, жағалауға жақын келіп дамылдап тұрған шхуналар ғаламат әсерге бөлейді. Жоғарғы жағы түйіліп, етек тұсы қазбауырланып, тұтаса түскен қою бұлттар аппақ айдың төбесінен төніп тұр. Айдың өзі бетін бүркемелеуге тырысқан бұлт арасынан сығалап, көл бетін айнадай жалтыратып, алыс көкжиекте деңгелеп барады. Мұның бәрі бір кездегі Арал мен қазіргі Аралдың бәрібір кіндігі бір екенін, Аралды қоршаған табиғат пен оның төбесіндегі аспанның қанша уақыт өтсе де өзгерге қоймайтынын сол өлкенің перзенттерінің есіне салады. Уақыт бедерінде Қосаралдың адамдары ғана өзгергені баршаға түсінікті. Өйтседе, олардың Шевченко сипаттаған болмыс-бітімі, мінез-құлқы біздің заманымызға дейін жеткен. Мұның өзі бүгінде өзіндік менталитеті қалыптасқан ұрпақтың баяғы бабаларына тартқанын дауыс айғақтайды.

Бір кезде Арал маңындағы қалың қамыстың арасында жортқан жолбарыс та Шевченконың қыл қаламына ілінген. Ол тұз тағысының өзін де, оның ту сыртына түскен көлеңкесін де мейлінше айбатты етіп кейіптеген. «А.Бутаков пен А.Истоминнің Қосаралды қыстап жатқан кезі» деген суретте саяхатшылардың өздері атып алған жолбарыстың бас сүйегін үйдің жоғарғы жағына іліп қойғаны көрсетілген.

1848-1849 жылдарда Арал аймағын зерттейтін экспедицияға басшылық еткен А.И.Бутаковтың есімі Т.Г.Шевченконың кейбір шығармаларында (күнделіктері мен естеліктерінде) аталып отырады. Зерттеушілердің мәліметінше, ол Кобзарьмен жақсы қарым-қатынаста болған. Экспедициядан соң он жылдай уақыт өткен кезеңде, 1858 жылғы 10 наурыз күні ақын күнделігінде былай деп жазады: «Владимирдегі пошта стансасында мен Александр Иванович Бутаковты жолықтырдым. Бұл кісінің басшылығымен 1848-49 жылдарда Арал теңізінде екі жаз бойы жүзгеніміз бар. Содан бері оны көрген жоқ едім. Енді міне әйелімен бірге Орынбор жаққа кетіп барады, әрі қарай Сырдария жағалауына



аттанбақ. Мен ол жақты еске алсам, тұла бойым мұздап кетеді. Ал ол болса, сол жерде мәңгі қоныстанып қалуға бар».

Ақын көрген қиындығын еске алып, көңілі түссе де, Алексей Бутаковтың Аралға деген ынтазарлығын ерекше атап көрсетеді. Шынында да, бүгінгі Арал туралы зерттеулерде А.Бутаковтың материалдары әлі күнге дейін кеңінен қолданылатыны рас. Оның үстіне қазіргідей Аралдың әлем картасындағы бет-бейнесі өзгеріп

халқының өмірімен айдаудан бұрын да таныс болғаны оның 1847 жылы жазған «Түс» атты поэмасынан байқалатынын айтады.

Тарас Шевченконың жоғарыда аталған күнделігінен Аралдың бір кездегі бет-бейнесі жөнінде толық мәлімет алуға болады. Онда айналдырған екі жыл ішіндегі Қосаралда болған оқиғалардың бәрі мейлінше көрініс тапқан. Бутаковтың экспедициясының барысы түгелдей жазбаға түскен, әрі Шевченконың барлық шығармаларының аяғында мерзімі көрсетілген. Сондықтан бұл мәліметтердің бәрі нақтылығымен ерекшеленеді. Осы тұрғыдан алғанда, күнделіктегі «1848 жылы Арал теңізінде үш ай бойы жүзгеннен кейін Сырдарияның түпнұсқасына қыстап шығу үшін қайтып оралдық. Қосарал аралындағы Орал казактары жайлаған фортта біз жағалауға шықтық», – деген жолдардың деректік маңызы зор.

«І стала тьма, і од Уралу, Та до Тингиза, до Аралу» деп жырлаған Тарас Шевченконың Қосарал туралы толғаныстарын ақынның ана тілі – украин тілінде санаға сіңрудің жөні бөлек. Шевченко шығармаларының түпнұсқасы өз оқырманының жүрегіне алдымен жетеді. Оның Қосаралдағы көңіл-күйі өз тілінде былайша бедерленеді:

Мов за подушне, оступили,  
Оце мене на чужині  
Нудьга і осінь. Боже милий,  
Де ж заховатися мені?  
Що діяти? Уже й гуляю  
По цім Аралу; і пишу.

Қазақ ақындары Т.Г.Шевченконың өлеңдерін сөлі мен мәйегін сақтап, өте көркем аударды. Біздің әдебиетіміздің тұлғалы өкілдері оның шығармаларын таза қазақша сөйлетті. Олар түпнұсқаның бағасын кемітпей, шебер тәржімалағаны соншалық, Кобзарьдың жырлары қазақ ақыны жазғандай болып шықты. Мысалы, қазақ әдебиетінің

классигі Әбділда Тәжібаев Тарас өлеңін өте әуезді етіп қазақшалады. Бұл аудармада украин ақынының ішкі әлемі, жан-дүниесі, қайғы-шері айқын көрінеді. Сонымен қатар, ұшы-қыры жоқ телегей теңіздің, сылаң қаққан Сырдарияның, Шевченкомен бірге мұнайған Қосаралдың бейнесі көз алдына келеді:

Жел шатыры желпілдеген!  
Көтерілді кең кемеден.  
Қоға аралап Сырдарияға  
Жылжитты кең толқынменен.  
Қош бейшара, Қосаралым!  
Болдың ортақ тап екі жыл,  
Қарғысыммен, қайғымменен.

Тарастың танымындағы Қосарал өзі секілді мұңлық, өзі секілді жұпыны, өзі секілді қайырымды. Ақын айдынды Аралмен сырласады, оған ішкі күйінішін, қиналысын жеткізеді. Қосаралға бауыр басып қалған ақын кетерде онымен қимай қоштасады. Осы көрініс Шәмлі Мұхамеджанов аудармасында өте сәтті шыққан. «Қосарал, қош бол, жұпыны, Қалпыңды сенің ұнаттым. Екі жыл бойы мұңымды, Ұмыт қып, мені жұбаттың».

Ал Ғафу Қайырбеков аударған мына бір өлеңді Тарас Шевченконың «Қосаралдағы айлы түн» картинасының жырмен бейнеленген нұсқасы деуге болар. Арпаны мен жер, дала мен теңіз, күн мен түн, бұлт пен ай ымырт үйірілген алагеуім шақтағы уақыт пен кеңістіктің арпалысқа түсіп жатқаны секілді әсер қалдырады.

Күн көзінде бұлттар жүзіп барады,  
Қызғылт күрең бояу жапты даланы.  
Ұйықтауға шақырғандай бейне бір,  
Теңіз күнді құшағына алады.  
Сүңгіген күн жасыл теңіз қойнына,  
Елестетер құндақтағы баланы.

Бейнелеу өнерінің туындысын сан түрлі бояумен әспеттеп, өлмейтін, өшпейтін құндылықтар қалдырған Тарас Шевченко сөзбен де сурет салады. Сөздің бар бояуын қолданып, табиғатқа жан бітіреді. Көркем пейзаждың шебері табиғаттың әсем көрінісін ақ қағаздың бетіне көшіреді. Содан соң өлеңіне өзінің көңіл-күйін дарытады. Тарғыл аспанды, жуас толқынды, сұлаған өзенді, бұққан қамысты қозғалысқа келтіреді. Кең далада жүрсе де, еркіндік жетпей тынысы тарылады. Айдынын керіп, алаңсыз жатқан теңізге келіп, мұңын айтып шағынады. Тарастың сол сәттегі көңіл әуенін қапысыз ұққан қазақ поэзиясының алыбы Әбділда Тәжібаев осы көріністі аударма түрінде көркемдеп бейнелейді. Бұл өлең де Әбділданың шеберлігінің арқасында қазақ ішіне аударма екені білінбей, қазақша жазылғандай болып жетті:

Аспан тарғыл, толқын жуас,  
Жатыр өзен сұлаған.  
Желсіз қамыс бұғып басын,  
Бейне мастай құлаған.  
Тәңірім не көп жатам ба,  
Кең түрмеде далада.  
Аралында соры теңіз,  
Өтіп өмірім қалам ба?

Осындай көркем аударманың мэтрлері арқасында қазақ даласының өз Тарасы болды. Ол таза қазақша сөйледі, қазақтың жанына үңілді, қазақтың ұлттық ой-санасының дамуына да үлес қосты. Тұтас бір дәуірдегі мектеп оқушылары Кобзарьдың өлеңдерін жатқа оқыды, оның өмірбаянын өнеге тұтты. Өрине, қазір заман өзгерді, ұрпақ ауысты, жаңа құндылықтар пайда болды. Бірақ Тарас Шевченко қазақ жеріне, қазақ тағдырына қатысы бар тұлға ретінде бағалана бермек.

Бұл кезең айдынды Аралдың шерлі шөжіресінде және көне Қаратереңнің толғаулы тарихында «Тарас келген...» деген атпен қалатын шығар...



Т.Г.Шевченконың Қосаралдағы өмірін зерттеумен Арал қаласындағы №14 орта мектептің мұғалімі Л.Сапожникова, №199 орта мектептің мұғалімі Ж.Ділмағамбетов айналысты. Әсіресе, №14 орта мектептің өлкетану музейінің жетекшісі болған Людмила Сапожникованың еңбегі ұшан-теңіз.

Кенестік дәуірде украиналық қаламгерлер қосаралдықтармен тұрақты байланыс орнатты. 1960 жылдарда «Вечерний Киев» газетінің тілшісі Петр Шкляржук Қаратерең (бұрынғы Қосарал) орта мектебіне хат жазып, мәлімет алмасып тұрды. Ал Шевченко өмірін зерттеген украиналық жазушы Анатолий Костенко 1983 жылы Аралға арнайы келіп, Қосаралдағы Тарас ескен жиде ағашын көріп қайтты.



кеткен кезеңде ескі мәліметтерді нақтылау үшін сол экспедицияның деректеріне үнемі назар аударылады. Бутаков жазбалары көптеген елді мекендердің, теңіз төсіндегі аралдардың, теңіз қолтығындағы түбектердің бұрынғы бейнесін қалпына келтіруге мүмкіндік береді. Бұл экспедицияның жұмысына Кобзарьдың да үлкен үлес қосқаны анық. Тарас Шевченконың екі жылдық оқиғасын қамтитын бұл күнделігінде оның өміріндегі Қосарал кезеңі бірнеше рет еске алынады.

Т.Г.Шевченконың күнделігіндегі деректер мен мәліметтерді нақтылаған С.Шестериковтің түсініктемесінде ақынның Арал аймағына келуінің жай-жапсары айтылады, ақынның бұл құрамда атқарған міндеті жөнінде баяндалады: «Бүкіл топқа жетекшілік еткен капитан-лейтенант шешіндегі Бутаков Арал теңізін зерттеу және сипаттамасын жасау жұмысымен айналысатын экспедицияға солдат Шевченконы суретші ретінде қабылдады. Шевченконың бұл жорыққа қатысуы Бутаковқа кейіннен жайсыздық әкелді. Ақын 1950 жылы екінші рет айдауға жіберіліп, ауыртпалықтың азабын молынан тартты. Өйткені оған патша үкіметі жазу мен сурет салуға мүлде тиым салған еді. Арал теңізінің сипаттамасын жасағаны үшін Бутаков Берлин гидрографикалық ғылыми қоғамының құрметті мүшесі болып сайланды. Соңына көптеген арнаулы еңбектер қалдырып, контр-адмирал шенін иеленген ол 1869 жылы қайтыс болды».

Ақынның күнделігіндегі фактілерге орай берілген түсіндірмелерге жүгінсек, кейінірек экспедиция басшысы капитан-лейтенант А.И.Бутаков пен корпус командирі Обручевтің жазу мен сурет салуға тиым салынған Шевченконы топқа қосқаны үшін жазаланғаны туралы айтылады. Обручев Петербургтен сөгіс алады. Бутаков та жазасыз қалмайды. Бутаковтың тиісті орындарға берген ресми ақпарында (донесение) «Солдат Шевченко Арал теңізі жағалауындағы және оның маңайындағы көріністерді суретке тарту үшін корпус командирі болып тағайындалды» делінген.

Т.Г.Шевченконың қазақ тілінде бірнеше рет шыққан кітаптарына оның Қосарал елді мекенінде тұрып жазған өлеңдері молынан енгізілді. 1848-1849 жылдары соңына «Қосарал» деп қол қойған мұндай өлеңдерінің қазақ тіліндегі нұсқасы жиырмашақты ғана. Ал Т.Г.Шевченконың өз отанында, Киевте украин тілінде шыққан «Кобзар» деген кітаптан оның «Қосарал» деп қол қойған елуден астам өлеңі жарияланғанын көреміз. Демек, оның өміріндегі Қосарал кезеңі – шығармашылығындағы жемісті кезең. Бұл жөнінде 1961 жылы жарық көрген Тарас Шевченконың қазақ тіліндегі таңдамалы шығармалар жинағына алғы сөз жазған әдебиет сыншысы Қалжан Нұрмаханов былай дейді: «Ақын сол жылдың қысын экспедициямен бірге Қосаралда өткізеді. Аяқ басқан сайын бақылаудан босанған Кобзарь осы қыста творчествоға бүтіндей беріліп, өзінің тамаша өлеңдерін жазады... Оларда ешбір уайымның, ешбір өкініштің ізі де, көлеңкесі де жоқ». Сонымен қатар, Қ.Нұрмаханов Шевченконың қазақ

## СЫРЛЫ ӨНЕР

## Аудан әкімі қолөнершілерді қабылдады

Түпқараған ауданының әкімі Ержан Күмісқалиев «Бір ауыл – бір өнім» жобасы аясында кәсіп бастап отырған кәсіпкерлермен кездесті, деп хабарлайды Түпқараған ауданы әкімінің баспасөз қызметі.



Көрмеде қолөнершілер экологиялық таза қой мен түйе жүнінен өнім даярланған және өзге де жұмыстарын көрсетіп, аудан басшысына ұсыныстарын айтты.

Аудан әкімі оларды қолдайтынын айтып, арнайы ғимарат ұсынды.

- Ауданымыздың кәсіпкерлерін қолдаймыз. Соның ішінде қолөнер бұйымдары өте ерекше. Сіздердің кәсіптеріңізді одан әрі дамыту үшін арнайы ғимарат әзірлеп және мемлекеттік бағдарлама арқылы еңбекақы төлеу мәселесін де қарастырамыз. Өнімдеріңізді сауда орындарының сөрелеріне қойып, тұрғындарға қолжетімді бағада ұсынсаңыздар жақсы нәтиже болады, - деп атап өтті аудан басшысы.

Сонымен бірге қажетті құрылғыларды алуға да көмек берілетінін атап өтті.

## АУЫРМАЙТЫН ЖОЛ ІЗДЕ

## ҚҰРТ АУРУЫ ҚАУІПТІ

**Туберкулезді жеңу – бұл тек физикалық күш емес, сондай-ақ қоғамның бірігуі мен жауапкершілігінің нәтижесі.**

### Туберкулез туралы не білуіміз қажет?


Туберкулез – бұл жұқпалы ауру, көбінесе өкпені зақымдайды, бірақ басқа органдарға да таралуы мүмкін. Оның негізгі қоздырғышы *Mycobacterium tuberculosis* деген бактерия.

Туберкулездің бір ерекшелігі – ол ұзақ уақыт бойы адам ағзасында симптомсыз болуы мүмкін, бірақ ақырында ауру белгілері пайда болып, адамды әлсіретеді.

Ауру негізінен ауамен таралады, яғни туберкулезбен ауыратын адам жөтелгенде немесе түшкіргенде бактериялар ауаға шығып, сау адамдарға жұғуы мүмкін. Сол себепті аурудың алдын алу үшін туберкулезбен ауыратын адамдардың қоғамнан оқшаулануы, сақтық шараларын қолдануы қажет.

Туберкулездің басты белгілері – ұзақ уақытқа созылған жөтел, кеуде ауруы, жоғары температура, салмақ жоғалту, түнде терлеу. Бұл белгілердің бәрі бірден білінбеуі мүмкін, бірақ уақыт өте келе денсаулықтың нашарлауы байқалады. Егер осындай белгілер байқалса, міндетті түрде дәрігерге көрінуі қажет.

Туберкулезді емдеу үшін бірнеше ай бойы арнайы антибиотиктер қабылдау керек. Бұл емдеу ұзақ әрі қиын, бірақ дұрыс емделсе, ауру толық жазылуы мүмкін. Дегенмен, антибиотиктерді уақытында тоқтату немесе дұрыс қолданбау бактериялардың дәріге төзімді болуына әкелуі мүмкін, бұл емдеуді одан әрі күрделендіреді.



Туберкулездің алдын алу үшін ең тиімді әдіс – вакцинация. БЦЖ вакцинасы балаларға егіледі және бұл вакцинаның туберкулезге қарсы қорғаныс әсері бар. Сондай-ақ, туберкулезбен ауыратын адамдарды ерте анықтап, оларды дұрыс емдеу арқылы аурудың таралуын тежеуге болады. Туберкулез жұқтырған адамдар қоғамдық орындарда сақтық шараларын сақтау қажет: маска кию, жеке гигиенаны сақтау, медициналық көмек алу.

Туберкулезді ерте анықтау және емдеу өте маңызды. Бұл аурудың қоғамда таралуын болдырмауға көмектеседі. Қазіргі уақытта туберкулез көп жағдайда емделетін ауру болса да, дәріге төзімді түрлері бар, сондықтан оны дер кезінде емдеп және алдын алу қажет.

**Нұркен БЕГЕНДИК,**  
аудандық санитарлық-эпидемиологиялық бақылау басқармасының бөлім басшысы.

## ЖАСТАРҒА БАҒЫТ

## СТУДЕНТТЕР ҚАРАЖАНБАС КЕНОРНЫНДА ТӘЖІРИБЕДЕН ӨТУДЕ

«Қаражанбасмұнай» АҚ-ның (ҚБМ) өңірдегі оқу ордаларымен ынтымақтастық туралы меморандумы аясында биыл студенттердің тағы бір легі кен орнында тәжірибеден өтеді.



Өндіріске аттанатын білім алушыларға ҚБМ бас директорының кадр және әлеуметтік мәселелер жөніндегі орынбасары Ренат Қаражанов тәжірибеге бағытталған оқыту жобасының маңыздылығын түсіндіріп, сәттілік тіледі.

Былтырдан бері Yessenov университеті мен колледжі, Маңғыстау энергетикалық колледжі және Түпқараған гуманитарлық-кәсіптік колледжінің 2,3,4 курсында оқитын 17 студент Қаражанбас кен орнында тәжірибеден өтіп жатыр. Енді олардың қатарын аталмыш оқу орындарының 13 студент толықтырады. Тәжірибеден өтушілер алдымен қауіпсіздік техникасымен танысып, өндіріске аса қажетті мамандықтар бойынша бірнеше бағытқа бөлінеді. ҚБМ-ның білікті мамандары студенттерге жетекшілік етіп, мұнай игерудің қыр-сырын толық үйретеді.

ҚБМ жастардың білім алуы мен мықты кадр болып қалыптасуына ұдайы қолдау білдіріп келеді. Соңғы бес жыл ішінде облыстағы оқу орындарының 120-ға жуық студенті тәжірибеге бағытталған оқыту жобасының шарапатын көрді. Жоба олардың алған білімін тәжірибеде қолдануға зор мүмкіндік болып отыр.

## ОҚУШЫЛАР АВИАЦИЯЛЫҚ БАЗАДА

Сайын Шапағатов ауылдық округіндегі орналасқан Сайын Шапағатов мектеп гимназиясының 9-11 сынып оқушылары авиациялық база 30153 әскери бөліміне экскурсияға барды.

Оқушылар Ми-35 м, СУ-27 және Бинлонг-БПЛ әуе қорғаныс күштерінің техникаларымен танысты.

Аталған шара жастардың бойында патриоттық сезімді ұялатып, азаматтық белсенділікті арттыруға бағытталды.

Экскурсия барысында оқушылар әскери бөлімдер базасымен, оның құрылымымен танысып, қызметкерлермен сұхбаттасты. Естелік суретке түсіп, сұрақтарына жауап алды.



Меншік иесі:

**MAŃGYSTAŪ**  
MEDIA

Директор  
Гүлмира ӘБИШЕВА

Қабылдау бөлімі,  
тел./факс: 20-48-34,  
mangystau.media@mail.ru



**Ақкетік**  
арайы

аудандық қоғамдық-саяси газет

Газет Қазақстан Республикасы Мәдениет және ақпарат министрлігінде 06.02.2013 ж. тіркеліп, №13362-Г куәлігі берілген.

Редактор –  
Милана ЕЛЕУСІНОВА  
Тілші – Ринат ТЕМІРХАНОВ

Газет «Маңғыстау - Медиа» ЖШС ақпарат және дизайн орталығында беттеледі

Беттеуші дизайнер –  
А.РАБАЕВА.

«Атырау-Ақпарат» ЖШС баспаханасында басылды. 060005, Атырау қаласы, Ж.Молдағалиев көшесі, 29А.  
Тел: 8 7122 458-660, 586-392.



■ Газет жарияланымдарындағы автор пікірі редакцияның түпкілікті кезқарасы болып есептелмейді.  
■ Жарияланған материалдарды сілтемесіз кешіріп басуға болмайды.  
■ Жарнама, хабарландырулар мазмұнына редакция жауап бермейді. Редакцияға жолданған материалдарға рецензия жасалмайды және қолжазба авторға қайтарылмайды.  
■ Тақырыптық суреттер галамтордан алынады

Таралымы: 420. Индекс: 65809.  
Тапсырыс нөмірі: 0160  
Газеттің бағасы келісімді

АУА РАЙЫ БОЛЖАМЫ

11 АҚПАН  
түнде: -2 | күндіз: +1

12 АҚПАН  
түнде: -1 | күндіз: +1

13 АҚПАН  
түнде: -1 | күндіз: 0

14 АҚПАН  
түнде: -1 | күндіз: +1

15 АҚПАН  
түнде: -1 | күндіз: +1